

四庫全書

集部

欽

定四庫

全書

集部

弇州續稿卷一百九十二

詞林官編修臣潘庭筠

侍讀臣孫球覆勘

總校官進士臣馬懋

校官檢討臣鍾建

纂錄監生臣

纂錄監生臣

欽定四庫全書

弇州續稿卷一百九十二

明 王世貞 撰

文部

書牘

吳明卿

吾郡之梓人來以天下之手書及大集見示得窺全豹

且飽臚腹不勝暢慰隨草一紙以謝亦作數行不謂其

人尚浮沉也因憶獻歲前後尚有兩書報足下而忘其
郵數千里外固當不易耳茲復夏致前帙適蹇使君來
訪屈指千秋之業即以授之俾為指南耳諗體氣勝佳
且有含飴之樂秋來雙桂更鍾慶門吾家兩小阮亦似
可望異日修通家之好當不虛也肖甫遂真作少保圍
玉甚俊第恐不為顏始平所收足下以元馭大拜戲我
初地發心尚不貪轉輪王位况宰官耶元馭元美兩不
涉也所云有齊雲之游便以一棹訪我伯玉書來亦同

此懷當營兩糟丘相待秋暑尚溽強飯自愛

又

足下一舢舨破二千里浪而拜先大夫之墓因以訪吾
兄弟此誼當不減范巨卿嵇叔夜弇中雖陋薄日烹一
伏雌亦足以少淹從者而王生力相阻謂足下畏熱不
堪道路為歸計甚迫忽忽相舍既審足下憇垂虹曳足
練酌中冷款牛首與邦君搢紳留連彌月乃大悔恨毋
論孟公笑人即不能輓青牛之引為我戔五千言而去

也八月望李本寧來九月初歐楨伯亦來楨伯談與足
下晤語歲盡周秀才來稱足下歸後至靳訪顧氏兄弟
因得一邂逅且致足下聲良慰僕不堪城市之嬈以九
日避從深落荆藩墮戶禪坐經行嗽糜粥佐以蔬茹葷
血絕口飲可三五盞然不復對客尚未斷筆硯然絕無
應酬以此沒齒而已元馭非常之眷不能不仰答家弟
為尺一所驅接浙而行家馭雖病除目亦在旦夕矣所
謂四王者當僅區區碩果諺所謂看盤核也大集付剗

厠當以完周生言足下北園餽釘峯石未足游目而他
莊舍皆有名山在几案間山頭飛泉處處不絕皆可引
以穿舍作池流觴養魚而都不料理何也僕鄉間地畝
許一池一阜梅竹具體而兒騏手經營自咤絕勝弇中
世固有夜郎王哉呵呵

又

自傳足下有內召消息旦夕在望已而見臬長之新積
者三四疑其故而不得然不意其有白簡也白簡有

之然不意其覆罷覆罷有之然不意其報可也大抵蛾
眉宮妬羊腸世險於窺伺者無怪獨陶鑄之地不應蕭
條至此足下獲落三十年竭歷萬里計方以息肩為快
千秋之業亦不借一官甲乙所惜者右文之朝乃有此
事耳弟坐起萬卷間以新葺良醞佐其倦山園水石日
涉成趣而微苦客謁及徵文人刺促不減催賦念所苦
樂惟足下同之邇亦有傳北來耗者謂且見收錄李少
卿云丈夫豈堪再辱耶以故絕不置方寸所謂老死是

鄉足矣家弟詩比益進而忌者亦益進匡廬吏事稀簡
有山水足暢少留寄祿亦終拂衣子與遷轄洪都得時
相聞又德甫輩不落莫也肖甫甫開府而有太夫人之
訃助甫差自強伯玉業掩關尚令人不忘之良足歎也
賢郎才氣汗血千里而不能免銜檠之累宜加精進小
兒今春始似知學者于鱗意氣功名二語遭姍罵數場
然是吾兩人今日事寄去二詩比之二十年放歌雖衰
颯然不至憤厲用壯如何念欲走一介相聞而會有姻

家楊興國便敢附誠楊敏秀有幹才惟足下相為成之
餘不具

又

楊使君家屬行有不腆之啟幣及扉頭二詩計已徹記
室矣無何得楊君札津津善足下不置且欲為盡梓全
集而以叙見委僕謂此君能爾足下可以朝夕矣賢郎
比益進業天縱足下以餘日縱橫藝苑當此缺陷世界
中不可不自快也僕比於山園構一樓頗具清幽之致

因盡徙諸書名畫古器以充之置榻其間信手披覽雖
米顛寶晉倪迂清悶恐不能遠相過也時時有香茗美
醞之類佐其倦間一縱步竹木垂蔭清溪白石畫橋油
舫在在不乏微苦為襦襪子所撓然不爾造物小兒又
相妬矣騏漸解杜門仲季風氣亦日上阿敬前後遂舉
五雄以語足下當一撫掌若子與不能不眼赤也此君
於季夏履任德甫用晦差不落莫何故已有齋捧之役
日下可相會餘不一

又

秋中得足下及楊使君書云已買舟將訪我海上急麾
阿段滌弇園一片石以待及使者將手教來云連有宗
黨之戚未成行色沮久之知更諗花月為期則日日從
江梅探消息不能待桃李也僕自入夏移息茲園有法
書名畫古翫之属暇則步屨松竹間聽鳥聲臨清溪垂
釣調赤白鸚鵡又有白鸚鵡作叅軍語間一過家課大
兒文義次二孺風氣日上九月幸舉一孫里社杯酒大

足藏身唯文字夙障未盡往往供人役若責負進以此
小不快耳相君頗自悔兩移書示且推轂足下弟觀此
人豈真青雲物耶家弟擬入境即移文兩臺乞休恐彼
中未便許但渠意已決尼之不可楊使君迫欲梓足下
文集以序見托比來更成杳然何也張羽王流落可念
足下幸為游揚諸監司間此子足稱名士沾沾自喜以
故不受世路容然聊蕭之亦甚矣侯老故長者不作柴
棘可親也子與宦況既適亦不必過為子息計自在足

欽定四庫全書
卷一百九十一
矣辱扇頭新詩把翫如面僕亦有兩詩試讀之履當及
於寢門外也客次不一

又

得書知有新婦戚且歲侵不能無虞於謀生世界故自
缺陷無足論也前後記辭腴于柳柳州矣詩尤快人臆
覺與張羽王往返者尤勝羽王亦自翩翩踰於生平但
弟與此君急難中有所援昨以一時扇頭慰之而了不
答何也楊使君欲梓足下前集累以叙見屬但得卷目

便可命管城子矣弟自丙子歸沐絕不為出計一丘一壑差足送日而誤有雞肋之命辭疏至公車而見尼遂為年少所窺其所萋菲語毫髮不相涉第園池酒食差為豐美雖與客共之不能無愧心也楊使去適入霅哭子與不及附書登堂後事事可為酸鼻今錄去奠章輓

詩雜詠足下雖游神鈞天讀之當為失聲也弟許其家

作墓碑伯玉任誌銘傳當以仰屬適劉子成中丞兒書至知此老亦遂化異物吾與足下辛後死若大白之配

金匱要略卷之九十一
殘月每握管作墓中文輒悵惘累日生趣向盡奈何奈
何賢郎計當衰然兒騏文筆差熟而見屈於學使者不
免為補國子矣餽粥之地白於甌脫有司責賦甚力尊
罍之類盡作人質庫物而為此不急務可歎可笑舍弟
比宦跡定矣餘不一

又

楊使君人歸得足下手札及損佳貺因獲承動履且許
以來春入茗下哭子與遂訪我於弇園無任懸想扇頭

一詩叙致歿存天真懇篤寓寄酸楚所謂長歌之哀勝
於慟哭殆非虛也不揣嗣音非敢自托和郢粗見我兄
弟同心之契耳尚未得楚賢書伯氏想當褻然不知李
駒在齊何如豚兒秋試卷覺遠勝前歲而斥主者命也
今歲饘粥之業大半巨浸久困公私責首粒飲器盡入
質庫而貧戚遊士尚不見寬俞仲蔚以八月錢叔寶以
九月皆化異物其症悉同殊令人有憂生之感近伯玉
司馬忽寄一書來中云弟叙四部稿事甚高上但獎飾

過甚引擻不倫或恐增少年筆舌耳弟在館中已作此
丘行徑但不能絕酒肉今來轉更泊然而世求我於聲
色名利間直大耳三藏也弟已任子與墓碑足下不可
不作一傳餘不悉

寶後復不
然至今牀第矣

又

前有一札附楊使君人去計已達矣弟自仲冬生辰念
及先大夫見棄之歲忽忽意不欲生者數日而不能語
人自是一切世味皆灰冷歲除後忽有所證遂斷房室

屏服翫日或一肉或茹素酒損十之七八更半歲後可
作有髮頭陀矣而筆硯間夙障重未即能盡損家人生
事產出入了不挂意而鄉里酬酢亦未即盡謝却豈亦
老人十拗之二也楊使君快士也每述足下不置口且
盛欲刻大集云足下以少騷賦故尼之夫騷賦何關壯
夫事楊除目亦只在旦夕恐不能完此段佳話如何足
下東游之興何似昨聞注司馬亦欲來此而竟未果符
繻久已絕附客舟往返又恐盜賊行路殆無所不難也

家弟入覲病發請告會小間遂為所物色見尼江湖間
殊少氣色除目霰下而羽王尚蕭條鮎魚上竹竿可發
一歎呂相公遂不起少郎果移家不能不累足下將牢
也楊驟行倉卒不竟所吐亮之亮之

又

楊大夫使回得足下一札承聞善病狀連苦無歲蝗蝻
繼虐剪棘構室而材不繼賣文自給時復筆枯兩地數
千里何事相同若此弟乃能盡洗一切耳目口體之

好兒子十二三即付以田舍圖籍僮奴子庖酒告之曰
若輩能杜門不犯三尺足矣其他長賦踐更任爾力大
小吾不復與也旦夕披一衲攜佛道書數卷入小蘭若
矣雲山冰井記惜不於瘧鬼作熱時得之當令五內頓
爽今者青女漸近一讀冷氣侵骨不免呼功裘耳所委
歌詩亦似有興而語不稱法當由能所心一懶俱盡第
不知足下執筆時亦肯小放真宰閒否楊大夫久不遷
相當鬱鬱漸不及足下梓集事羽王西正注辭甚修而

宦轉躋躋奈何然亦不可盡歸之命也秋氣漸涼強飯
自愛

又

歲時三得足下書而所與書偕來者強出園一寒暄而
已業授家兒子輩其母齷齪守困不能應客所謂此園
記仲氏志銘者再見之亦再報啟致歎賞而不審其浮
沉與否茲更辱手記滿紙離索之懷與消搖之貺蓋兩
備之僕宿根頑鈍至今未有所證第於此心不敢自佚

朝夕焚香誦經三時默坐一褐一飯一菜一茗此外不以累妻子惟米汁故好不能遽斷夜進僅五小杯雕蟲夙障無容盡洗或一應遠方故知死諾而已別誦諸哀輓之作始知足下於交誼篤遠不墮孝標齒吻中間情事宛縟無間長語而篇法尤勝長歌當哭信然哉子與遺文乃閩人郭生收去近始編類得八卷以寄家弟云有二冊者為他一生竊之非關汪惟一也家弟方更從

其家搜索及尺牘

之類

幸

肖甫頃所刻

有

五

汪

詩刪竄入魚目至一玷于鱗為識者唾笑於子與尚似
有羊曇一慟不至如足下所謂弟久不相聞云已得末
疾恐就木矣足下集成須早授梓為海內詞人指南亦
少寬僕與于鱗撻撻之苦又曹平原所云後世誰相知
定吾文者觀子與寢寢覺此語之味深家弟雖皈心道
門然以其間理農圃課兒輩誦習黠於伯氏多矣一笑
二俊今秋當聯翩脫穎兒子嗟咤俛首老博士業甚令
人憐之然亦無如之何錢唐脫巾吾輩已辦跣走今雖

幸小貼而隱憂非淺故人僅肖甫一碩果而置之風霜
鳥雀中傳張羽王曳裾今在何邸展轉溝壑俱可念也
楊丞人便附此初夏猶冷加食自愛

又

十月初蘭溪胡元瑞來云見閩人謝某新刻有哭足下
絕句方食時箸為墮地終夕彷徨既馳信從肖甫所問
之不獲報乃有一楚人游宦者云武昌見伯子入棘試
義佳足下當無故以是稍自寬而學者至矣披緘不暇

讀但絕倒稱幸甚而已海內豪傑盡唯吾二人者歷
落若長庚之配殘月胡可遽與嚙嚙小星等泯楚書至
伯子復塌翼即肖甫三雛助甫一弟一子及李駒亦爾
而豚兒乃猥先一鳴小足吐氣迦陵頻伽諸和雅音自
是競新矣足下所云云非直肺腑亦大是左券弟門戶
足寄寧敢蹈藉天福而此忝稍覺隄分於恬澹中不免
蛇足之懼耳長篇大帙走价千里誠知兄念我愛我然
得無衣鉢一事於孺子有深私耶渠已北上謹拜瓦鼎

詩軸附信致之餘儀壁返亦坐拘例耳來示北園花竹
日益勝而有酒食之累弟久閉關弇園游屐踽踽不能
矯首楚望即子與殘客非足下又誰托耶誦三山記殊
灑然西塞諸磯玄真枕席地嚮者一過之若飛鳥而已
王竹甫者亦善攻字琢句然得心應手終當讓足下也
弟於一切有為都謝絕筆硯役猶未盡每恨三十年前
誤入此因今日受此果然見兄縱橫跋跋眉宇間猶似
有起色以此知習氣難除不獨大如葉耳子高之困

名場久不無畏首尾宜鼓其氣而充之季子國器足下
自能鑪錘毋俟贅也偶從書肆得豚兒兩筌蹄今封去
或可佐千慮之一惡詩書扇併宋榻聖教序充書室清
翫不一

又

前使者至得吾兄手札及詩如自合浦還明月珠喜尉
之極粗於一律見其大都耳所謂心之精微言不能盡
江陵歟後宇宙間遂一翻覆全楚髀髀兄獨超物外當

時忌者安在哉第一稿不耳嚮時不任毀令亦不任譽
弟為眼底應酬及筆研所困終須被髮入深山或可了
此一段未了也周弘禴戶部至云足下近謁太和歸錦
囊所收當不訾能相寄示否肖甫膽略遂不下郭汾陽
助甫亦漸趺跋為吾黨增色黎惟敬逝矣作夢既成兩
日而遂委蛻大奇事也葉山人茂長奉謁便附數行先
容山人才氣磊磊恐足下門客先無凡人得無止
園厨料耶一笑

又

僕自正朔為兒輩舉屠蘇畢即足下六衰觴耿耿胸臆
矣而會病羸至春中而劇藥餌不離口又時時為戚友
強以筆研之役如青博進六月病痞七月病脾八月甫
起色而伯玉肖甫訪我弇園元瑞仲淹輩亦麇集幾復
作高陽故事九月始息肩勉為足下草此壽言既成都
不曉何語年來棄家兒輩為儉歲所窘一絲一粟亦不
從之貸乞欲遣老蒼頭躡屨而西即以行路難為解益

刺促者久之而後成發扇頭二絕皆真境真事也台垣
婁易楚地諸貴人亡不髡髡者獨不能動足下北園清
夢問字乞言之客踵相囓也亡論廷尉羅雀門當亦不
寂寞矣第僕已誓佛前於獻歲斷筆研猶恨足下居僻
不獲以牛耳相贈俾跨有大江以南操管之士沾沾景
從然舍足下與伯玉何適伯玉亦現衰徐徵其七著不
大損小足慰耳肖甫則真大貴人也家弟課子讀書學
稼為圃進不慕二甫達退不作乃兄迂憂然大足生活

所慮掛名未盡或為弋者所慕耳賢伯季學故當大進
僕長兄興盡已歸粗代酬應二孺知弄筆墨聊以暖目
前而已

又

知吾兄至吳闕為羣彥所挽謔浪杯酒縱橫翰墨今湖
山一益生氣二令差不俗比之此間千石奚啻霄壤前
所遣蒼頭想已奉仙舟入雪矣每念二十五年之別合
并旬日談笑差足相快然至別後忽忽如夢却又恨春

夢之不長也分韻三章勉已塞白又得謁墓一首久不
復問工拙矣行父復致前幣不欲再返俟齊安王生後
便當一修縞紵之敬也并仲美俱煩致聲彭生事已悉
吳子輩惡心腸乃爾何以面足下使孝標在茲時不知
作何語也姑緩之必有以處西望楚雲心寸寸折不備

又

方畏客而劉山人者以足下書至破例見之此君懸河
之辨不必一一破的亦使人忘睡所不欲東為我舉六

裘觴第與人無所比數蓼莪之痛桑蓬獨深以故買一
舴艋避客菰蘆中彌月而後返中寒作楚亦所不恤足
下第舉中散故事惠而好我攜手同行不唯泉石增色
餅壘亦嘈嘈也佳集稍得從容詩故所服膺文華亦自
冠冕一代覺新都相公所評似但及有韻何也仲冬始
見楚錄而二倩不與令人扼腕一段蒙氣似尚在吾曹
兄不聞李駒耗耶已游岱矣白雪樓作他人物幸兩雛
補諸生尚小慰地下僕第二兒病弱尚在湯藥間小者

文勢小進與兩猶子似可更結通家緣家弟啖荔枝已飽或量移矣元馭自以手足之痛乞骸不已非有他也前有報書樊山即附眼鏡足下何繇不達餘不盡

又

昨息庵上人行便數行申契濶之私計已徹覽矣數日内都即報知聖躬違豫所諭疾狀似非盛年所宜有既而一即官上書過切至觸天怒自江陵奪情之後絕廷訊久矣似亦非盛世所宜有且恐羣少年不察揆也苦

心又作一番描畫也如何如何吾文雖寄跡江湖當不
忘宗社如弟及此却不免杞人誚也年來忽忽厭俗殊
不怯死近得一簡便法或似可不暫死承欲訪我海上
當設醴芼羹於弇中以待青燈促膝所欲傾吐者方內
外悉有之計吾文當不異顓俟俟家弟白下之期在歲
邸聞不一

又

新歲不聞問昨邂逅一故司農郎熊姓云欲叩玄關直

自太和歸以微疾謝客且諫私宦言我東海上尋故劉

子成中丞之子一介來出老兄數行則熊所云信矣犬

馬之齒本不足言且蓼莪刺中焉足以辱高駕惟是先

君子十七年未竟之事賴臺議見伸天子之寵靈施之

表大官之饗得知已老門人餽之於私慰矣先君子

二品未滿考而宗伯引軍功得全葬先恭人僅四品封

而兩與同祭此殊典也弟以宗伯疏不及贈諡不復請

而太原公念鄉前輩故特為之收疏草以上今獲云付

部矣然且匝月而未見覆得非為弟未有尺書謂之傲
慢見尼耶主上所以勤施勞臣已足其榮固不在一階
半級也子成集固宜叙然有兄先之安能不虞形穢哉
此間淫霖幾四旬饘粥之業滙為巨浸咄咄中具報不
竟所吐亮之亮之

又

劉將軍去有不腆之物附八行以報計徹記室矣麻城
王生者來云足下且以盛夏抵秣陵訪我於牛首燕磯

間時有傳伯玉亦且至者使我夢境亦自神王既審足
下且未成行伯玉復改期秋杪為之悵惘移日僕茲出
成小草且寒香火之盟而江山名勝亦足游目却不免
有五悔出後家弟雖不成噎而痰火時熾汨沒湯藥不
能歸視之一悔也病婦展轉牀第遘此儉歲三兒饘粥
之業盡廢二悔也初意染指即尋遂初而諸乞骸者俱
不得請三悔也欲有所建白而度必無益囁嚅喉吻間
竟成伴食四悔也白下士子所萃適當試期揮汗酬應

五悔也足下高卧北園曳足覩甄洞以清風為故人誠
若霄壤雖然悔之晚矣自貽伊戚夫復何云足下方為
李中丞致拳拳而此公中文罔令人喪氣適邑子俞易
之便索數行以見貪得近況漫爾附聞不次

又

仲子來拜手教具山中之況已從禮補陀僧所得第二
札其時尚未審亡弟之戚也無何使者至得第三札則
有見輓亡者六章蓋字字鮫人珠矣使他人見之尚且

酸鼻而況為之兄而自相知已者耶又況衰羸待盡之
軀將并二人為一者耶至於感激思報一念之私有非
筆札所可述矣弟病間將三月近始能進匕箸第形神
忽忽無復生趣前有小疏塞白出月初繼上乞骸之章
亦知歸故里百憂叢集無筴可避且擬視亡者兆域求
不朽之辭少慰地下即掩關却掃飾巾待盡以自附於
首丘之義云爾肖甫兄亦於閏月二十日長逝此兄名
位已極膝前振振繩繩亦復何憾但國家失一緩急倚

仗人吾曹益零落可歎耳耿大夫云見楚錄伯子復失
利仲子雋才必自能騰蹕第少年之染頗深弟數促之
不肯歸以此負足下耳弟欲不言似負足下益深言之
恐復蹈癸酉之疑如何勉成長公七十詩既羨之行更
妬也雄章崇有即付之孤姪俟弟行狀成專人拜致不
腆之幣請太史公傳并伸謝也不一

又

前有兩書附復計俱已徹覽矣劉典寶來得足下書以

專為謁玄嶽修路功德而發及讀疏辭雖不必本色語而自古雅暢利非足下老手未易到也修路母慮數萬金賢王盛念與足下高誼此兩大檀越弟何敢不奉佐一二但南都遭此大侵中產以下未轉菜色安能勸率使作眼外不急之務諸募者耽耽不過兩殿織局三中貴守備一魏公而已魏公近實其家方治喪葬請恩卹費且萬計須從人貸勾三中貴前以陸司寇相拉募明州阿育王塔緣輦感而應覲顏而出何可更作馬婦也

昨歲五月餓莩十萬人京兆之粥塲而當事者不能以
單辭勸富家捐升斗之惠即使弟不恤號召之勞亦誰
為響應者夫以堂堂之列卿而為藩國募緣似亦非體
以故輕辭以返王之幣而詳辭以解兄之疑雖然彼若
能以大辨才開大因緣弟亦不為沮也有蒼頭一似是
兄家幹欲得劉太傅書兄既無來示又不知其意聊為
草草應之胡元瑞詩數附去渠故有宏識於足下昧平
生而深景慕殊不多見季子云久在蕪湖頗有所聞幸

勿簡義方勤加劖琢肖甫前書已具之李中丞不成死
矣舍誠意而務修身遂至名與身俱敝惜哉聞新正有
意金陵便當日望雲氣於龍江口也

與郭中丞

世貞自鑿坏以來於世事一切不敢入耳目亦不敢挂
齒而至開府臺察監司郡縣諸公則以家族桑梓之故
不能遂漠然年來水旱疫癘為災百端而敝邑尤甚所
以苟安寢食不至一夕而三徙一飯而三輟者蓋唯藉

我公祖而已陽月翻臺省流言則自縉紳先生以迨田
畷紅婦靡不駭愕咨嗟甚至欲甘心於豺口而會尉留
之旨旋下用是稍自安乃者公祖之辭疏甫上而得請
量移之命因之當路者果何說也豈其不悉公祖之賢
將弁髦家族桑梓而不之卹耶抑借以是調停言路也
公祖夙慕惕厲躬行儉素宴游之跡不及別綰筐篚之
施減損數倍集思廣益勤恤民隱而為之爬搔衽幘之
獎掖循良俾之得盡其才力而誨其所不及即聽事之

所人置一撫公在上蔀屋之側陋與戟門通而靡所不達不佞燥髮所見聞二十餘公恐未有如公祖者也自周文襄之為惠王端毅之為直而彭惠安之為詳懇屈指而置公祖居其四奚愧也燕中之去吳三千餘里士民往返不虛日即目有不能逮何至併無耳也場屋之事下走承乏楚臬則彼中已有預薦者藩司一二公能為之而故使走知之走以故辭兩房卷不閱而左轄得以為奇貨既啟封則舒侍御者無如之何矣蓋嘗相顧

而與走竊歎母論公祖即逝者如舒侍御亦寃也十二年以前僕時憂居鄉則見有談何心隱與邵樗朽皆大俠也其所為如在吳興在新鄭諸事皆目所不忍聞也母論其捕逮與瘐死非公祖所繇即自今而後二三直指不能衡情法而斃一大俠此又何說也江陵之忤懷與一時之奉行者誠有之然不至人人皆奉行事皆忤懷也今有所不合則皆援之正而有所合則皆斥之邪僕以為母論被斥者即江陵不為寃亦未盡不寃也

公祖歸不過六月息耳去而移福一鎮無非王土王臣
獨吾吳分淺耳下走自麾節駐吾吳不能一趨候於交
戟之下昨夏過敝邑則屬有采薪之憂又不能望見顏
色而今者又不能從父老攀挽其為簡嬾自遠何可言
獨媿媿於筆札間而賤且愚未必人慕而信之即公祖
得無以為調語耶雖然下走非為調語者也聊以洩其
不平而已領教未期為道為蒼生自愛

王太僕

漢上獲晤清徽於今垂十五年矣中間雖一致卽襄之
問載附弇中之書然以十五年例之其間濶可知也昨
冬季二孝廉來稱翁人賜難老神彩殊王飲噉勝少年
時而諸從及孫枝連翩森舉蔗境之嫩津津不容口乃
者從白下接令孫太學所稱述大過之已而出翁所寄
二詩知翁之念我深矣已更出全集得盡窺鉅麗之盛
而賤姓名之辱存於篇章者指不勝屈也不佞貞何足
以當翁臆何翁之為長者而不佞貞之為小人也蒲柳

之質衰在老先無復世念久矣先君子既荷主上恩卹而身復偃蹇朝命至於再三懼負幽明勉強一出竊謂留省優暇苟便懶拙而麋性多驚魚樂難問悔不可言茲因便聊此致候私并成一詩書扇將意非敢自附玉案也賢從光祿墓草雖宿門楣益壯中丞銜寃夜郎幸為致聲自愛鄒律之噓當在非遠餘不及贅

與張司業

山中扶病領大誨者兩日霍然病良已蓋見公本體既

自澹然而於人情物理又復條暢雖有應跡而無滯心
所以藥我者至矣成均之拜固以諸生表儀仰借然何
不還公白虎一尺地其於啟沃聖心陪贊國是豈淺小
耶玉堂諸賢自公外所心儀惟有兩定宇耳趙公故是
天地間陽明之氣所鍾今遇所不可即憤憤乞歸似發
之太早斂之太速鄧公堅卧不出奈何此於出世大業
甚近且易但以爲仰師弟間答問公案照之覺但得其
體未得其用也似俱少公大還一點化耳僕齒頰餘生

於出處甚細出故無益處亦非高但鑿坏一念發自庚
辰春仲必不敢渝乞骸疏上想廟廊諸公當見亮也荆
老雞骨支牀然有羶德而人悅之響從景附徒足相苦
而已春氣漸和珍重珍重

弇州續稿卷一百九十二

欽定四庫全書

弇州續稿卷一百九十三

明 王世貞 撰

文部

書牘

石拱辰司馬

張肖甫人至致公手札大教若羨弟之處而猶使之與其憂者弟處故自有一盟然亦見當時事不可若手自弟

面上眉耳世始磨之一官以了彼事弟縱欲有所為寧肯信之欲有所言不羣咻而攻之已幸又寧肯虛心而受之耶前見邱報公復進少司馬深為世道喜不敢為公喜也今得來教則隱憂媿媿知公亦不自以為喜矣所諭謁陵之費且百萬夫謁陵誠祖宗故事弟當時不過費十萬金而已何必九倍其數薊邊之練卒二十年矣何以屬國之騎旅入而不能支江陵晚途驕恣貪狼而宵人又為之翼而長其伎罪固當然有交結紊亂一

律可引也胡至誣之異謀且堂堂天朝而主上所師禮
之臣至異謀於國體不少損元氣不小壞耶六七少年
其脩怨者不過快心於一擊干進者不過求合於一喜
而了無毫髮忠君愛國之念當事之臣雖極調劑支吾
而太阿倒持事權傍落將來貂璫之毒與縉紳之禍不
知其所底止趙汝師固賢者弟殊不敢信其能任大事
所見惟一王元馭能持平識大體雖小傷迫急得慎重
如公者夾持之必有可觀而病弱又多奇困之懣似不

能出柰何家弟承公與陸與繩推轂之愛此番或不容
已但非所以愛之也弟方避徙林居一粥一蔬以了殘
日而為公所挑不覺墮口舌阿鼻覽畢幸付祝融為懇

又

昨歲見吾丈移疾䟽即走一介至滁陽奉訊而文旆已
北首矣川途阻脩鱗羽莫繼雖仰止大雅時時在懷而
音塵迫絕不謂有劉長洲之便得奉教札恍佩穆如之
風惟是鄙言不足以發令先公潛德而法書豐碣表之

隧道何以令信本迴車愧謝愧謝吾丈之賢所謂北斗以南一人而已漸遠之羽固足儀世而廟堂諸公不為蒼生強借何也嫠婦不恤緯吾丈寧能偃然高卧於漳濱竹林間耶若弟昨者一塵啓事真所謂骰子選也亦自度其不可出上書力辭已投公車而會有尼之者盖未幾而南牀之白簡上矣吾丈以正人飾獎則不敢當此曹子以為邪人稍有所不能受耳弟之三起家俱非本意其前兩起屬臺諫尉薦歸田以來止是不能拒絕

游客園池為家幹遇有脩飾無緣復望耳聲色之好

平泊然今乃無故描寫作一韓熙載良可歎也趙選部
芳聲英英在耳今得暫歸與吾丈相劇切不朽之業甚
快甚快幸轉為弟致聲外兩疏稿附覽後疏垂欲發而
徐相公力止之已付之忘言矣欲吾丈少知其梗槩故
也弟兩少子頗能讀其父書前歲舉一孫甚穎秀天惠
餘日跌宕書史翰墨間政恐人妬吾處耳吾丈麟趾亦
遂振振否家弟歸還本省小簡跋涉之勞物情若此恐

亦非久計也承念存并賜札當覓便致之餘不一

又

中秋聞吾丈有東門之邁為忽忽廢食寢數日高嘉定
來得手書知後庭有就館者期在十月而穆少春札亦
云胎氣佳以星數推之當舉雄則又欣欣喜色見大宅
屈指湯餅之宴復逾旬矣弟有三兒大者業差就小者
亦似能讀父書今損家付之一月不令一見而不能忘
情於故友乃爾豈新謂老人一物耶

有一物此身

自見廢來偶有所感耳世途以為林壑之樂不減四
禪天至欲拈瓣香謝言路二三君子而時時跡雖書不
下漳河傍輒彈指浩歎此非欲以苦事撓吾丈欲得實
心堅力如吾丈者居其難而後吾儕得保其易也今天
下見為治者形耳如何如何穆兄負經世才而逆錮之
不使展然彼之逃於詩也亦甚矣經世是仁者事度世
是智者事出世是二地以上事然亦只在一念耳詩偏
名術也視酒色差不俗然損道一也昨念吾丈極草草

成五言四絕句預賀夫既以薄之而復蹈之得無為穆
兄笑乎語云倡優拙則鐵劍利吾丈覩其拙而知其不
大損於道也曇陽子化事想或聞之其所以化恐未悉
也今錄上一通欲吾丈知天下有真人有真理幸毋以
為癡人寢語也

又

昨劉長洲人至得穆兄所致手札雖與吾丈聯姓名云
賢器病危甚意不能久書草草數行作報殊更憂之舍

弟自覲歸云會趙吏哥知賢器竟不起為彈指歎說者
累日夕弟自偶有聞證來兒女子之累付之搏沙觀久
矣今設身處吾丈五內忽若蝟刺不知作何法解也吾
家夷甫癡語未暇論東門蒙莊亦姑置之但為吾丈宗
祀大計則莫若豁哀以葆真節慾以全神時至則行聽
其自然勿正勿助長乃第一義也天道有知必不使賢
者如吾丈斬焉絕其後時事極矣天下之寶尤當為天
下惜之弟百念俱已灰惟覺此身未即死當傾耳以聆

吾丈芳問耳茲因赫司理便附此尺一中有司理公車
中有魏懋權真天雄一枝桂也

又

前者因令人喚兒子歸草草一札附問不意其人道病
淹久我公入臺之後唐突威嚴乃不見責而辱之書且
侑以一絕則几杖之賜矣來教娓娓謂不才尚在可收
錄者未幾而即有留尹之命知公所以培植不佞不淺
也不佞生平跡弛無雕飾又不曉事言路莫致憎口戕

金史卷一百九十三
宣再辱希復世念會庚辰春孟偶有所證捐家入茅舍
飯蔬飲水一裘一葛以保此半殘之軀即吉凶訊問都
廢人固有咲其愚而憫其能自固者苟冒昧復出將以
我為如何人也昔有使王孫奉橐而進茗者戲以一粟
投之即捐橐於地而趣就粟不佞之不為王孫者幾希
羣龍滿朝岩穴向盡吾丈與二三大老尤自傑然即天
下所可言可為者皆已言之為之如邇者大䟽及月林
公䟽是也即使不佞出亦安能有所加也乞骸之章必

得請而後已久廢物外村童無可使者又念損兒曹橐
唯公憐之從吏焉麟陽月林二翁皆舊辱教愛不敢以
私瀆聞便間希叱名道意不備

又

前時劉長洲人去有報札計已達記室矣道體當益健
勝麟兒襁中應自嶄然頭角繩繩之喜入熊羆夢者此
非其時耶台鼎易鉉名為賢喆彙征而殊有不盡然者
偶從邸報見一御中名其并一疏以直臣未有為說

差強人意記僕在日

時

江陵雖

亦

晚途狼狽至此蓋誘之者使昏激之者使忤語有之不
忤不求何用不臧又云涓涓不塞將成江河豈欺我也
第入茅廬來絕無所證祇於閒中勘得身世皆幻春仲
一病荏苒幾殆亦遂任之幸而自活家弟歸旦夕相煦
沫差足相老間為世道念須公與元馭出磨洗乾坤一
遍毋論元馭草土即輦上君子肯許展公十指否此語
近亦似伏櫪老驥不知兩鈍足已賣作僧廬長住物也

一咲一咲長洲應召便附此不一不一

又

前者劉長洲之報啟甫去而老丈之教札復來蓋以豚兒叨忝故喜浸淫於大宅即不啻如弟自言之也此兒嚮亦有微銳可以一闔今強弩之末矣殆如木鷄矣誠不意其叨忝之若是也弟既猶在世法中不能如我古先生一洗而空之若乃誦大易之盈虛味老子之寵辱則懔然有餘懼矣

何以教我

龍

故自無碍但令作美食食乳母佐以粥糜勿遽沾腥味
當以漸充強況後居復兆熊羆之夢所謂老蚌出雙珠
德門故事何足疑耶少春大悔欲毀詩梓聰明人易撥
如轉圜今但秘之可也渠詩故自有氣骨孤行之當自
美愛不然弟亦何惜糠粃之引耶長洲覲便聊此附謝
并布不腆統惟照亮

又

家弟自燕歸得我老丈教札慰存勤懇至巨羅與托尚

方精醪天子所以錫勞臣者乃亦舉以見賜會兒姪及
孫凡八人適集舉以屬之曰異日誰當為石司馬公者
飲此各奮而爭先則無弗沾沃者矣弟自入年來影不
出郭門幾若虎溪之限遠公而近聞有司之舉先君子
及朱中丞統之卹典也倉皇走謁臺於陽羨句曲間乃
聞已寘之條奏之歟矣先君子之見抑則以高宗伯脩
新鄭之緒論謂徐文貞庇鄉戚而中丞之有遺郤於通
倭者也咸勒候另議弟之腐心不朽者十七年於今矣

幸自臺建白發之則當事者可以無弄掃之嫌而被恩者可以洗丐乞之辱但在條陳則於始末不能無畧而先君子南北十年之勞遼左千級之績或未之及縱無閤寢而沾被未沃人子終天之恨終無以自釋矣宗伯公通家之契且與弟有文字知意必不薄懇老又與岨老從吏之并達於祠部君生死骨肉之惠也情在迫切餘不敢贅

又

前月有便附小啟及穆太公墓表去計已徹記室矣月
之十八日薄暮得亡弟十四日見訣書一紙大槩謂四
月初已作死計不意更得百日此番種種惡證俱集力
憊氣淺甚難支持恐在旦夕且自負有膽決加以學力
定力故遂能輕死破戀今日方下此死手工夫寧耐不
然遂躁亂不能攝持矣六親既已無情即見吾兄亦如
不見天下雖饑聖主能蠲賑事尚可為唯願廟堂勿固
寵勿近小人勿搜求人過諸君子勿偏見勿立黨勿思

報復則天下自平矣此外復有二百言多致意故舊語不及私弟時已煎迫若在尼連河中然尚謂其辭理明哲結法道美異得數日延也別發兒曹一紙則以是夕街鼓動逝矣痛哉當臨絕時呼水洗足匡坐湛然如定如寂了不怖散亦無痛苦念惟此子名行粗立文業粗就諸兒三者已亦嶄然頭角可靡憾矣獨年僅踰天位不稱才且僕叨長十年去土何幾乃不死而今此子死也崦嵫餘日烟靈眯眼熒然之軀顧影局促生趣盡矣

愚兄弟得奉侍長者與元馭相公皆荷深愛不啻骨肉
哭死唁生知當為我惻惻也偶因秋省役便敬布腹心
得賜一言或誅或贊以為死者不朽幸甚區區俟過萬
壽節即上書乞骸歸治窳窳於先壠之傍且結茅作丙
舍朝夕三遺魄預鑿容棺之墟以待未審輦上君子能
矜此情否三吳亢旱已極赤地千里堯湯之災未聞接
踵司計者何以待之餘不能贅

侯舜舉方伯

昨張生歸草草贄數言為報未既所吐永嘉山海之勝
見謝監詩為東南冠而門下方握詞壇牛耳九合之餘
倦而息焉以與二三勝達跌宕文酒以此上酌天公何
快如之僕亦有一圃足暢邑當孔道為客所騁無復生
趣今蠖竄一團焦尚復跡之不已旦夕唯有緇衫行滕
耳客之佳者曰曹子念其人負奇氣工為文詞雖鬚髯
戟張如傖父與之談則醍醐也渠游貴郡為報王大叅
陽德知已然其意以不登鴈宕不謁二谷公是世界缺

陷事唯門下進之初夏未熱加飯自愛

又

僕為郎時從故吳中丞峻伯張太僕有功游業已聞公
名矣垂二十餘年而始於行卷中見所造雜詩若文更
以為西京開元間人而又十餘年而讀公全集乃獲盡
鉅麗之觀如漁孟諸而獵雲夢也三載前有張山人兔
缺如方子自言館公別業已舍去游金陵今年復來訪

足加跛如庾玉臺
一槭啟之則公凡之以為累公凡

耶則公於執苑稱前輩非公札耶抑胡其瑰麗而爾雅也或張山人借以重焉山人恐未易辦也雖然無似敢緣此而脩咫尺之書以從門下後塵幸收之僕齒雖少於公然蒲柳易衰一切俱謝去於三尺蒲團地了此生耳公負絕世資必當為出世業時不可失也峻伯有子稼澄以諸生稱詩大是後來之秀亦聞之否餘不具

答劉方伯

世貞自丙子以來含饑抱慚於閭井者四載偶有小証

始擬寘此身於軌跡之外而未能廟廊之上收拾陳物
猥及衰殘顧影自咲不能出應非敢用為名也夙業障
成誤落雕蟲窟中影響見跡俾長小國之賦使從事齊
盟苟不愛齒牙流美即來識者所笑不以為磨昏鏡則
以為嗜昌歎如其不爾怨亦如之以故塞兌掩耳蝸廬
躡伏寧自絕於賢人長者而令子仲君忽負笈相枉適
世貞以先君子事出謁部使者於句曲陽羨半月始得
歸門者出一敝刺而後知之乃來介復以門下大教隆

幣與仲君之高篇見辱矣門下海內名家出入中外踰
三十年鼎鉉步武拂衣高蹈蟻觀一世而折節賜推唯
是過情之譽所不敢當乃其辭旨之精麗警絕則下走
之所忻為執鞭者也冢器玉折豈唯貴門棖棟之痛當
為天下惜之仲君方辭璞却湏加琢廟之功不患無陵
陽賞識也如開歲春和能嗣前駕則弇中山靈先為除
徑以待或能少助千慮之一外薄物附忱不具

答丁太僕

僕哀懶杜門與世路隔絕家弟間致大疏一二與左降
叙復始末不覺壯氣攻中浸淫大宅尋晤汝師宮洗則
謂門下躬行君子不為名高其所欲言舒吐盖未竟一二
而朱嘉定汝虞亦復疊疊且謂門下將俾効不朽之役
於王父司馬公蓋飲淚涔涔沁心腑矣僕故崎嶇坎廩
人也生不受人知乃獨受司馬公知於疾風板蕩之日
有餘寄焉迨公養重梓里僅則偃蹇衡門暨強起仕路
而公已游僊都宦轍見左無由一酌橋公之墓而叩陵

嬪之堂自謂此生無可仰報而使者至將致大教果以
神道一碑見委司馬公三品大臣天子賜葬而此獨闕
焉不文事固不偶然也僕於東土所見公擔荷三四大
事有出於銘狀之外者僕雖愚敢不自勉第來諭獎飾
過當夫以太山北斗之擬即昌黎得之尚不能無愧色
而况僕萬萬不及者哉洗筆研來已半歲不免復煩墨
卿汙之且負香火有所不顧矣滁陽山水永叔伯安二
先生嘯歌之地併門下而三汎滌意氣自見天則區區

除目非所以為賢者重也朱令有中牟密縣風而上人未盡知想當不惜齒牙餘羨伏暑未蠲為道自愛

顧太僕

嚮者門下請告宅憂梓里之日僅一奉顏色於山觀而不克報訪又承致令岳士雅先生詩集累帙而不能報謝又以其時有筆札戒不獲附不朽於九京罪過種種猶曰巖穴之臞固雲霄之所弗深計者乃邇先君子賴羣公恩庇得沾身後而貞匹夫之節不固強出從大夫

末則於門下固首當投刺自通負荊請罪者也門下以
正直忠厚柄國家之公是者累年而始釋之進陪九列
步武八座蓋不直鄉邑之光重而已憇伯回之堂誦斯
臧之句則一紀前有如不佞者在焉特哀劣過時之人
無所比數不足以辱大念耳齋䟽人便肅此附候寅陽
丈不敢輕瀆便間希為致聲不次

荅李惟貞大叅

仲冬為不肖腐心之辰以故汎一葉為泖中菰蘆匿而

諸以筐篚見辱者尊則執事親則吾敬美皆不敢發械
誠欲以例他客也公祖猶以此介介將無謂不肖薄之
乎罪死罪死子念冒熱馳二千里為其故府主稱祝走
雖為道地借一力於麾下誠貪與公祖相聞耳渠用期
迫窮日之力故不及請非敢弁髦長者之惠也得教不
以常調為意使長孺聞之積薪之語從咽中下矣然何
至大計吏時敢信信其吠耶此曹子縱有胸無心當不
若是不過一二蔑戾車耳兒子失學放黜其宜豈敢更

有希覲賢器比當益大就昨伯玉司馬來云與公祖為
半日飲每語必先不肖使人鼻端拂拂有金華洞天想
家弟似得齋捧後旬後或可趣下風大貺拜嘉并有薄
物將侑乞鑒入

又

伏承賜示以袁生所具查應減稅糧宿弊及該府覆議
令不佞看詳惟是不佞哀嬾之心計且素不習於錢穀
出入之數無以奉酌德音皇恐袁生為民苦心大堪

敬服但止是見一邊語中間有以別項增派而并入正額者有以此額而却應彼派者有雖增而必不可省者有可省而必不可省者亦有可以通融處置所謂寬一分民受一分之賜者明公須會府縣正官細講一番請之兩院將應減之數不論其可否一達戶部聽其回報其必不可減且有著落者曉諭百姓勿妄希覬不然愚民無知妄謂袁生減糧數十萬為三吳造福而上官壅遏之是袁任其德而諸公任其怨也適見廟廊大老亦

有書來云云不敢不以聞若乃明公欲定畫一之規不使每年議派則革吏弊寬民瘼杜浮言之大端也二冊暫留看倘急須當別封上不一

又

僕不佞自郢里之卜夜與峴山之浮白別後輒恍然自失以為奇人難再奇遘難三不謂天假之緣得從宇下忘形爾汝披膽天日蓋三年如宿昔焉別後則訊問之信歲無虛季金錯之餉械無空篚春初以太夫人之壽

言見委恨不知耳知之寧有待教而後具草者蕪廢之
餘不能深湛其思俾辭與事洽而明公不遠千里顚使
遠謝鄭重其辭又綢繆其貺僕即不受傷廉之歎寧無
過情之恥乎武昌山水多名勝僕時苦棘事間以詣臺
紛紜不久量移無緣一極登汴之樂明公風流姿綦勝
小子百倍當無復遺憾第資望崇深恐不能久淹耳敝
邑望公如望歲豈有意乎僕雖老尚能從兒童竹馬後
也所喻甘君者并得其書誠奇士也明公稱其保持鄒

司勲事件柄臣而不悔前偶得一公書云鄒入銓無它
長唯推轂甘救陶善鍾而已矣陶鍾無足道若以甘咎
鄒宜甘之復見齟齬也論甘者以駁嗜之小疵而舍其
狗義之大節嗟乎世見誠可憫也所報甘書并壽言稿
附覽欲知僕之許彼至耳適老婦患風疾假假醫手倉
皇不悉亮之亮之

又

屈指與明公清洋夜別六寒暑矣自是歷三使君有三

遷而至九棘列中臺者明公僅一轉屹然於振衣臺之
陽豈武昌魚美足戀耶無乃葉公之好龍非好真龍者
也貞以先君子久鬱泉下蒙上恩隆重而召命再臨力
辭不得輦上君子多相譬說一念不堅遂成小草乃至
病弟奄忽竟阻面訣貞何人斯而亦用荆公家故事耶
苦痛慚恨不可言昨草具小疏苟且塞白冀竽濫之誚
小寬旦夕當乞骸骨耳明公不以一出為非而曲垂獎
飾使人涔涔汗下不能禁柰使君非面是人者當由愛

而亡醜耳亡弟遺詩文頗足不死今為刻其詩將成矣
冬盡補刻其文畢當以呈覽請正也大幣祇領并有薄
侑不宣

張都諫

嚮者門下以先德之重不遠百里儼然而辱臨之雖不
敢自愛其醜而值有遠客累不敢具杯茗為敬蓋於今
歎焉乃復更勞大誨重之以珍餌雖以不恭是懼勉而
拜嘉汗固簌簌下也日苦役役不能事筆研敬聞命矣

仲夏之暮當脫稿專人馳上先此附復不宣

又

嚮者遠勞尊駕責惠先壠僅得一踵謝堂下嗣後杜門
請告且以病弟拮据湯藥至不能叩明公艤首之北而
薦咫尺之書奉送此歉何如邇覩邸報知進補天垣主
持國是海內方拭目以瞻金鑑之上第明良一時百揆
時叙無足以當白簡者唯時進格心之論亟采下民之
咨務濟艱巨毋專直聲使聖德愈隆國脉愈永乃鄙情

所惓惓耳貞哀劣過時之人以先子蒙上大恩又不敢
累抗朝旨狼狽一出慚悔百端茲因齋䟽役便聊伸候
私伏惟鑒亮幸甚

周都諫

世貞不能自削其雕蟲之嗜而遽災木徃徃汚人目觀
又不能脩鄉里月旦以得罪賢者即不遂伏斧鑕蠖屈
草莽息黔之暇間及筆墨聊以送餘晷而已不謂門下
汰羣訾而錄存之萬里命書布以大幣俾為尊諫議公

壽言悚息不知所裁報惟是誨辭行述二帝古雅絕倫
嘗鼎一臠足占大烹牛耳之盟是在執事僕所撰造止
是苟就來旨組而成篇譬之佛語未離小乘今具稿呈
上即不以覆瓿似未足芥公壁也出處之示知門下憫
我至矣破甑何足復論縱令理之豈堪炊飯食人况蒲
柳易衰薑桂猶在未盡之軀得嗣相聞異日借門下一
字華袞為慊耳薄物侑將下忱不一

又

伏惟明公以花封高第超補諫垣復以青瑣名臣遴司
銓務一時聳然快覩為清朝盛事而白簡先後傳播遠
邇類皆蹇諤暢練恒傳國體國是不為詭激以徇時趣
區區固心儀之矣惟是薦賢大䟽羣材彙征萬目聳動
而貞之踈狂不肖却為濫竽其間惟且駭且愧不知所
以垂及一載有留尹環賜實皆緣大䟽為之張本貞得
苟雪前謗復脩朝列固盛惠也亦素心也第蒲柳之質
早就凋零樗櫟之材不任雕飾加以去春一病淹歷三

時今雖稍起神爽頽廢中間鑿坏之念尚有不可言者
乞休小䟽上塵台覽實出由衷無毫髮虛誑唯冀憐而
從吏焉貴科及省臺諸老先生以筆札告匱不能徧啟
仰祈均亮下情無任懇切之至

余德甫

晨報衙而楊中丞之使趨庭謂必有足下書迫扣之不
得而家人自吳中者有足下詩札則自西而東又復西
而北且五千里矣足下服除忽已三改火耶屈指吾黨

十餘人其不走長安塵者即卧夜臺耳獨足下懼於山
澤片語一事皆帶烟霞氣真令人艷羨第所覩右文之
朝乃寥寥無足下跡則不可華子師賈豎耳當拜公日
尚推管幼安吾儕亦安能自恕用晦之念足下深矣即
僕與子與不啻也子與方憂臺使者而薦䟽佳甚明卿
亦有內補耗想足下欲聞之扇頭一詩寓懷并新刻薄
物希麾置之春暖加飡自愛

又

得足下書感慨用壯幾不可讀二詩一字一淚第使僕
息心復小警急置之篋笥他日作一字一珠觀耳舍弟
初信但云足下有外服今始知為後母太恭人也天乎
何以有此始者羈於官不能奉一生芻以叩首先大夫
今又戀戀五畝不能買一舴艋作弔客與足下攜手匡
廬之頂抑何憊也區區叨忝已踰分今幸而遂初服快
於弛擔優游杜門賢於補劓矣第酒食翰墨本生人趣
日見嬈不休更成苦海如何如何念足下於文士中最

為高行而陵陽之璞今尚未有剖者明卿遂削籍子與
僅以長者得免尚在囁嚅間伯玉與家弟尤更籍籍然
此亦常理常情無足恠者用晦似欲輕裘訪我弇園足
下能方舟乎審爾伏雌斗酒主人所不乏也子與尚在
廣陵年踰耳順而買花不已皮之不存毛將安傅足下
便間徐風之扇頭一章不能酌來美聊見情耳餘不具

又

昨子與書來云足下僅一入省作兩日會而別家弟復

談足下山居時狀令人色飛杜門高枕謝絕塵世良快
第未知此中所得實際何如耳弟自九月舉一孫即為
親友以湯餅相期無日不酒山園石益舊花竹益新暇
則汎小艇溪間或入藏經閣抽一編翫朱魚調赤白鸚
鵡足忘老矣所苦者文字之業私心好之而受役不休
如責逋賦以此更成業障舍弟方盛年習為吏當婆娑
一官佚我於長林豐草而乞休甚堅不可止如何亦須
足下與子與方伯計之

家弟歸自覲得足下貺書宛然如奉顏色又亟稱足下
林居闔門養性偶一入城若威鳳棲園相驚指以為希
有之瑞亦何必減李元禮陶元亮自于鱗長逝忽已十
載當時雖爾惋痛亦不至神傷以此子業就足死故也
雲中哭子與還輒忽忽自失念人生有盡行且及之每
為人作誌銘投筆長嘆丈夫何至與地下結緣也春來
忽若有警於一切無明造作種種悉擬放下似亦得五

六分力矣念足下澹泊成性素自近之輒用此味分獻
不審肯領畧否近作數章在用晦處足下可取觀偶目
病而能書者少故也亦覺微露消息念之念之餘不具

又

端居多暇時時念兄不忘屈指依稀開七袞而姚匡叔
來乃云已舉壽觴矣倉皇成五言一長律致華封之祝
又春時偶憶前後五子已同嬰圃合其存者為申五子
篇手錄并上計兄得之當呼酒獨咲獨醺也足下長於

第一紀而神情逾王老蚌之珠其光炯然弟斷房室來
滿四歲矣春時困二監子殊不得其力唯喚主人翁惺
惺易曉耳匡叔與家弟爭言足下鄉居雅致何必減靖
節柴桑靖節攢眉不肯入遠公社兄亦豈其意耶毋論
入社與否西方自不無不可於眉眼下放過也冬寒加
冷自愛

弇州續稿卷一百九十三

欽定四庫全書

集部

弇州續稿卷二百九十五

詳校官編修_臣潘庭筠

侍讀_臣孫球覆勘

總校官進士_臣楊懋珩

校對官檢討_臣王鍾健

謄錄監生_臣趙之璧

欽定四庫全書

弇州續稿卷一百九十四

明 王世貞 撰

文部

書牘

趙汝師

每得公教札輒喜而不寐精進若此何所不詣弟自誤
作生計者三十餘年臨要緊時一句喚不來一字用不

着非唯喚不來用不着覺驅遣之尤難瞿生宗門之學甚精第恐更為宗門所牽將草鞋空踏破耳渠必欲往江西大抵江西三處壇場羅稍大胡似高李似實然不過宗門餘派耳今以儒道蓋之未免遮掩補湊不為朗著故於此子行不勸亦不阻俟勘破後返照此心恢恢故自有餘地也弟尚未曾描寫上大人將來或得小小實用譬之饑渴時簞食壺漿耳食前方丈恐却有不堪入口者如何所喻乃宇宙間盛事亦是宇宙間新聞但

默識之異時自見不足動公方寸五嶽也虞卿子無以
應命弟於子書原不曾購求止是憑鬻書人見貽故耳
公亦不必勞神作此無益事也

又

得教知尚書尺一甚峻不免北首爾時物情輻輳所謂
男子張君嗣附之疲欲死者但以恬澹二字應之而已
春仲遇閏可於陽月抵都庶免褫職之苦聖主當陽蒙
氣盡豁官府大小屏息奉法足下既以書生抗絳灌以

一絲係漢鼎天下公論待而赤幟千鈞之弩勿發鼯鼠
智深勇沉所以為大勉旃自愛僕自殘歲入春來豎子
見陵四大展轉無有是處任之而已所需拙文當錄出
俟春暖可必如約方欲以敬禮玄宴相托豈敢寶其敝
帚坐索重享耶

又

城隅分袂河嶽方寸歸舁艤兀間悔夜談之鹵莽差勝
元馭宗伯耳宗伯歸與述兄饑渴意渠亦惘惘不勝計

於書尺自悉之威鳳神虬世所景慕片語出口即為月
旦小爾舉趾便作模楷然在末法中亦有換人眼鼻者
納汙藏垢醞智養勇以期可久可大賢者當自饒之聊
致莫助之愛而已拙文塞白意故未已更成一排律并
贈吳太史其一牘及扇補附吳者幸為致之君典良友
已矣向見兄談丁丑事令人骨騰而屠令狀所不詳知
別有紀錄倘付侍史發下可據而表其隧也嚮晤徐給
事甚佳燕中故人如王師竹太史魏懋權博士相見通

為致聲他有問及者第云名教外一長物老詩自廢何足挂齒長途向暄善自消息不一不一

又

別後再接吳門及途次手札已有傳公見朝遷官宮洗三郎報至今人眼明公豈以一官半級為榮正為自此開彙征之路賢者魚貫而進耳每傳除自自八座以至郎吏皆可人此固執政者能虛心秉公不樹桃李荆棘而公與二三君子蓬麻之植不可泯也區區此身此心

皆如死灰不但無噓者即噓之亦不然矣第恨入春轉
因邁軸藥餌漸狎無復歇時而筆研之役轉深若此緣
不斷譬如蠅鑽紙窻終無出頭理新正便當一切盡掃
去之耳先師似於山陰他處微露一消息此大可慰荆
老柴瘠良甚而哀思不已酌酢轉詳物望既厯將來恐
碍蒲團大事雨亭先生一月三轉知為公力亦差足為
賢者吐氣第此卧苟不堅似公於波羅渡口輓轉之也
如何如何秋氣開美為恬澹二字留神不一

又

臘月內連得公手教具起居之詳且知僕兩信皆已達
又於荆老處諗公所述時事多可歎可恨野人幸脫世
網豈敢復預聞況年來姓名可更墮長安城作齒吻間
物耶唯是野人芹曝有不容已於公者公是千古偉男
子滿胸臆皆浩然之氣剛腸疾惡遇事輒發賢於我曹
栖栖碌碌虱處禪中者固百倍矣第不當小而用之輕
而出之夫亦有以如來法號告者乎釋迦者能仁也牟

尼者寂默也蓋惟寂默而後顯能仁之用也無已則有請告暫歸乎鳳凰翔於千仞兮攬德輝而下之在公猶綽綽餘裕也僕行年五十九名為棄家而實未能盡當為龐居士馬宜甫咲殺幸宿病良已而頑健勝於舊時獻歲即閉關謝絕一切酌酢亦不敢領筆研役而舊逋尚不少湏至初夏乃可洗盡也邢子愿欲刻鄙集已力辭之大抵利根自可湏更名根着力一鏟削耳瞿汝立來云有北使附此不一不一

又

昨蒼頭喚游子有數行奉叩起居計已達矣茲辱手教
滿帋具仞嚮道之堅與憂時之切所謂並行不悖者僕
自殘歲來三改火病羸惛惛秋中參朮始見功肌體漸
腴神氣亦王但苦筆札役未已一入新正必於上真前
作誓斷絕之矣不然終為一窩墨瀋淹殺無了期也昨
因病檢出數年來詩文一百餘卷掌故雜事七十餘卷
冬邸可就緒異日當露醜於公求公一序幸毋相負也

第此一念如迦葉舞恐終墮綺語障奈何奈何承示交
游中新得鄒諫議且日與徐駕部周旋此大足為麗澤
益鄒公負中外望太重一時公卿當惕息自勉無可以
當白簡者萬一官府微有不同誓御少爾違節輕為論
建偶致逆鱗羣公不免紛紜又增一番事矣須公不憚
斟酌務全國體乃佳徐君嚮托草其尊人志銘而未見
狀來非僕敢宿諾也元馭憂毀之餘為物情所羶悅弔
者不已病亦無已新婦復遘疾俄頃便逝見元馭羸狀

駭惋不可言公別帝勸駕之意良篤僕謂出世經世皆
賴此身吾儕小人不知其他唯以身為急耳近來除目
種種可觀孫選部誠名士似得公力不淺兒子流落京
邸使鑿坏之人尚礙眼耳可恨可恨今聞已歸差足慰
矣張肖甫便附此不一不一

又

新歲三日會瞿汝立云吾丈復動歸念有北人便即手
作數行附之計已達矣汝立去之旬日而見邸報則復

庵宮允為吾丈上請告䟽盖甫奉講筵之命而即杜門
何丈之勇於去也近事誠所不快然官府之與言路兩
皆有以取之亦各有未是處大抵三代而後不必事事
皆當意人人皆可觀亦只是小小補貼耳除目屢下田
野宿物收且盡而次及於僕齒舌之餘即不出豈足為
高吾丈視僕生平亦豈泊然無宦情者第嚼蠟之味覺
於戊寅鑿坏之誓堅於庚辰今雖上負賜環下負推轂
有所不容已也䟽不稱病而稱乞骸盖欲避調理之說

斷將來宦路吾丈念之念之計此時當已在道而未見部覆將無政府不自安強尼此行以為廊廟重耶

又

丁侍御迎家人至接手教及僕出處云二三君子意以為似不宜輕動張肖甫司馬雖媿媿勸駕而微旨畧如吾丈汪伯玉司馬有書亦爾乃知豪傑之見骨肉之愛與世情故絕不同也僅實未暇於中較量只為庚辰心盟必不敢負而已若宗伯公故當別論此公出果能行

義達道酌世撫物當亦為上真所許不然自當急流勇退尚未至老所虞病不任耳僕於外跡差近而心境未清雜念時起且世福轉深則道緣轉淺虛名日甚則實德日損以此恐恐不敢戀桑榆之暮期之隔生或易為力耳邇來處分多出聖斷不旁落大是佳境第某人消息若何鄉衮得自安否吾丈所稱近况與物情反側之故大抵當坦然待之惟月旦小加斟酌樞機時一檢慎可也初與宗伯計以留院相期不謂屬之貴宗亦似穩

延陵既特遷峻陪而吾丈仍故紱何也見補少常則孫
太夫人果物故矣家弟尚未覩除目渠似無可無不可
臺齟武定氏而宰公中丞不以為非則禍似不易解吾
丈可作培植語勿有所加也不然彼之疑愈轉深而於
先師談過之戒小成牴牾矣瞿元立第三弟復文懿一
何陵夷至此耶可嘆可嘆聞有使命䟽到日當不及為
僕借言然使僕至三䟽則苦矣餘俟面悉

又

昨草草數行附使者以謝計行期當在月朔兒子出送
荆老屬其少須於郡以圖一餞僕身滯環堵而心搖搖
挂故人青雀間邇荆老告别作大啼僕雖勉自制收淚
胸臆終不能忍蓋自愛弟入閩後二三故知搏扶殆盡
巖穴中僅一碩果形影相弔哀相漸現恐不能待諸賢
功成之日却笑安石老諄強以絲竹消之計惟有空王
一法而已公欲消搖留署為六月之息亦佳僕意不欲
太原公有所措置且親近公與洪陽及收召鄧先生輩

布列有位而已鄧似未肯公便問一吏之何如水利一
策尤長塞外不唯可實邊庾亦足制牧馬但須因地利
順民便如世尊所喻調絃之說乃不生變第目前欲捐
數十萬金作母而緩收其子於數年後恐司農眼孔不
易入也昨歲收獨常熟崑山儉而吳江次之吾州與嘉
定似小舒但積侵之後菜色猶未復耳此事撫按可以
調停要須廟廊作主大抵蠲赦利於頑猾而柔良不沾
賑卹偏於小豪而單赤鮮與一日不可無良有司如嘉

定令數十曹江南膏血當不賸盡偶為賢者一及之勿
復謂朽株尤有火氣也扇頭詩亦小見微意而哀落之
餘都不成語衣物至微尠寧足報伸僑札之好耳錢氏
墓表已脫稿幸為轉致侍御君不一

又

家弟歸得手教及詢之家弟云云亦相同搏沙作餅勢
無復合但終不至犯名義而顯為摧挫南雍一塊土似
足藏身僕豈敢作輦上解淡生活沾沾充隱弟實無能

用我者近遇一異人傳持頗有小驗甘老邱壑以俟師
期足矣瞿元立得補臺幕即資雖小屈而體面差佳但
不堪桂玉知何文舉生珠之賀不勝安仁悼亡之戚想
得公依止不至損耳楊戶部應尾忠愍公之子當洒掃
公門幸一慰藉之兒子嬾廢得公與沈宗伯相為警策
可望焚舟之舉僕却不敢別有希覬也族子養志老而
貧以一簿為蹄涔附此信不悉

又

家弟歸拜手教具仞念存僕蝸涎自濡蚓壤粗具於世
緣鮮所干涉獨先君子身後一事為忌人所抑腐心者
十七年於今矣曾有疏草托太原公而曾家弟北首屬
令上之乃云得所聞俟僕勉出而後成上僕不勝憤懣
歎曰此所謂馬生角烏頭白也兒子魯舉老丈教必須
撫按或臺諫建白乃可私心甚然之其道無繇也長至
後故朱中丞諸孫出燕中闔郡縉紳與兵道書見示中
間為中丞闡發幽潛懇惻悲壯之極云自吾丈手筆且

謂撫公已行郡覈矣倉皇與家弟謀以撫公為朱中丞
請而不為先君子請同事同鄉一舉一置人其謂何弟
復何顏焉請恩澤亦何辭見逝者地下旋走謁撫公句
曲則郡併以先君子報而按君條陳之草具幸皆在列
矣謂太原公再及之念此事在宗伯宗伯有通家分誼
且素辱文字知必不作前人忍既出臺諫公議如吾丈
嚮擬事體亦較穩愜第條陳列款勢不能詳加以年紀
向遠見聞稍異各曹之於政府不甚關白非吾丈慷慨

一言之誰為援者中丞尚未復官今始得復則已復官者自應獲贈亦事理之常太宰處不免借重大司馬矣按君痼瘵民瘼誦吾丈大䟽嘖嘖感歎條陳中二款實緣吾丈意為之尚懼司農之扞格也獻歲聞當上會典例有宮端之擢不然亦光學被金紫鳳凰臺一片地知雅意在攬輝恐不能相俛而下也瞿汝立前聞病阻良用懸懷覩除目殊慰此官比之二部掾却有生色艾光祿何以不召亦必用故事相尾耶吾鄉延陵有子不他

聘其恨轉深蓋以東土之抨全出吾丈又謂二三君子轉目之云退婚自渠故耳渠俟大察後擬北上方欲作官不至放對吾丈第以靜默待之可也兒子承規切明春始得一意筆研次兒托庇所苦良已殘歲復為幼兒了尚平之累可作無事人矣餘不具

又

兒子在都再書具感肺腑之愛及歸極稱公氣誼識畧以為生平目中無兩但欲舉世法之所艷者以加諸鑒

坏不能出之人復舉世情之所最忌者以飾樗朽無用之物則非知我愛我之意耳生平屈指故人元馭愛我而不甚知肖甫知我而不能盡公之見知太過見愛太深是不特粉黛土木且將文繡牲犧矣年來齒落無一二存者哀相屢現即使覲顏苟出不特上負師真下愧同志公試觀朝賢若此時事若此僕之墻壁若此而能有所謂劑得乎欲因而有所見且為縣官作纖毫益得乎萬勿齒及僕也主上誠不世出之主邇來作用大似

世廟乙未以前光彩而恤民一念又似勝之災異種種正是天心仁愛惟聞有可憂者腐腸之藥與伐性之斧耳昨見榮轉宮庶遂領坊事六典載筆成周之史佚白虎橫經元祐之正叔公但雍容步武以俟天人之合五嶽小起方寸即以吾師恬澹二字消之則所深望於故人也水田之說嚮見徐孺東極稱其利僕亦深以為然但思二百年來豈無一人識如孺東者中間必自有故故不甚從史之將來能竟其用否瞿元立有子大可喜

見間幸為致聲家弟承諸公雅意得一南除庶不以棘
刺中打筋斗也區區續集將二百卷在肖甫處魚豕之
訛不勝讐校將來不免求椽筆一叙之亦名根未鏟之
證也肖甫博大自是一鉅公邇來能自持正即有齟齬
何害然須賴公時時警策以善其後汪伯玉近相過數
日羅汝芳周思久二先生一飯而別其來歷不同皆異
人也餘不敢贅

又

兒子歸得公手札具肺腑語隨作一報封肖甫司馬郵
中致之計當已徹覽矣是時兒子言公極稱於所知謂
僕尚可一割故哓哓數語殊自悔之牝鷄豈亦堪犧而
故斷其尾乎一笑來諭謂姑與無町畦任其處分要歸
潔已此是野人片曝由來所獻純甫此官便是吏隱於
中少得恬澹趣豈受彼牢籠若爾瞻即日請假覺少揆
人眼鼻善類皇皇如搖旌矣公所云瞿元立云云僕近
來覺得機軸若此元立但勿於格外作念立足乾處彼

不得而親踈有何不佳文章一小技於道未為尊少陵
亦自言之何況我輩向亦偶為此曹子鳴其不平耳管
君近益精心佛門然好作有為跡得非蘇晉逃禪意耶
家弟以齋捧之役五日後可到矣冒酷暑驅馳七千里
寧無殷深源周子南之歎目下且欣聚首以濁酒澆其
磊塊而已承有令子舍之戚尤非旅邸所堪不能奉慰
聊此草復不宣

又

前有小啟附使者去計已達矣得太原公近書於吾丈甚注存以僅餘一直臣碩果不食不當更令南此當是真際語耳吾丈見示語甚適宜於此要見大學力家弟冒暑驅馳齋捧私心憐之欲為求一留司以稍弛擔且不捩長安眉眼仗吾丈大力今果得之其感慰當何如也僕學道無得衰嬾相藉僅成一酒食漢浮沉里社不敢作應世想亦不敢作出世想而昨傳聖問及賤姓名者此何所自幸三四大老寬我一壑中長物不至勞

齒頰也言路洶洶得小定否瞿元立竟不能小示超格
耳緩既有味卑散亦有味但桂玉可虞耳孫齊之兩兒
崢嶸足慰貧病餘不敢悉

又

邇有兩信通候計久已達矣僕殘人也初度之日方寸
若螫懼客見踪故買一舴艋避之泖湖塔中禮佛飯僧
冀小資冥福而已何足以當長者賀且縻絲文犀豈木
客山都所宜濫耶來諭知且委蛇史局即不作柱下玄

同於長沙太息少忍嗟問此是下情由來所願八俊之
說嚮亦微聞之今了然矣當事者不欲用公言然不能
不用公意也與其激而使惡孰若引而之善雖然獨行
遇雨若濡有愠此甚不易也高帝在天之靈使此曹之
終為呂強懷恩則善矣太原以友于之戚迫欲歸而不
得今作何狀公了不及之天下賢者寧復有幾彼此為
宗社蒼生勿以議論小矛盾使宵人得投間也君實與
子瞻晚好幾不終千載遺恨肖甫大度長者近見啟事

微牴牾得非持正之效耶僕老矣灰且冷矣而猶有習
氣在妄謂時賢語及氣節則蟻奔而附稍涉理學則魚
貫而上獨文苑一途轉更鬱塞公大將也與肖甫方在
柄忍不為小立赤幟耶家弟滯閩頗苦折腰少年前僕
謂入長安中亦焉能免折腰也但二十八年科第稍可
憫耳來幣附壁却有野人之芹知不以為美或不忍拒
也春氣漸和為道自愛

又

自吾丈別後感事懷賢之念時時觸中特以尊跡未定
遠信難托牢慙之思又無可告語者僅能於元立子澄
處一相問慰耳吾丈途中有一札與太原公語多右二
子渠頗不懌吾丈入朝後一書見及云宮洗比見貌和
而氣平但胸中尚有二子在更後一書釋然矣二子山
陵以前未必非羣然而攻之者未必是今聖見已定國
是已昭諸老在政第當以虛心受人語實心處天下事
不為利害謀不作人我相太平未有不可致者吾丈尤

不必輕及予告請南信心而行中立不倚此所望於大
賢君子也聞太原請假想亦為山陵一事勞憤致傷今
復得仲氏訃恐不任手足之痛奈何肖甫丈豁達大度
入領兵柄宗社福也唯要於情字上小破除耳僕少能
進七箸而齒落殆盡哀相種種與死為隣唯不畏死差
與人異大師信益杳然方以懸弧之日避客栖泖湖塔
院供佛之餘與僧共噉風雨蕭條景物晚莫所喜以故
人問若貂襜褕不鑪而暖却附復不次

又

久不聞問良用懸懷兩臺為先君子及秋崖中丞條請
恩卹前是一介以咫尺之書奉懇計已達矣太原公曾
為致情於臺使者故托之今尚未有定論想部中為冊
立午朝二事微左又考察自陳紛紜旁午故未暇及第
人子區區之情真以日為歲耳得北考察報甚寬將無
調停之說行兩相持而交餒耶令人慙慙覺得南中差
有耳眼野人不應作此尋常語當咋指自懲太原公近

札云公所上疏雖忤旨密致書於兩臺令尋公微指從容行之不意公不知翻以為恠所謂恠者必非親得之小一辨明何如此公與公本生死契鄙意殊不忍賢者之自為敵也僕今年六十有二賴小得將牢力粗堅色身以俟師期誠不願復塗抹也聞大司馬之去復繇中貴人清時有此可歎可歎適歸熙甫先生次子北上索數行先容渠中讐見法僕苦為雪之今事解而家破矣彈鋏悲歌中多伏檻語以公誼人且好熙甫祈一聞之

餘不悉

又

前出候病弟於奔牛見之則首問吾丈起居云八月九月間霜露之恙來病君子不能從事筆研不然先人壟頭一章當不讓景宋矣然今已勿藥今拜翰教果然且諗知直溫寬栗之誨能使諸生肅然而心服二百年來宋李復見今日竊謂省院大小南北徑庭何啻倍蓰獨南雍之重逾於北雍人材固爾也僕老矣衰與懶乘之

學道雖無所成然竊聆希夷澹泊之旨實不敢以天下
事措懷况病弟娉娉據梧老婦呻吟待盡袁氏之女又
只旦夕矣方拮据醫藥之不遑而能棄之出乎老大盖
信僕之可而不能信僕之不可僕於此月之十九日已
發䟽乞骸必不得請當謀再上非不知上恩不可負知
已不忍違且貪與賢者少日周旋恐有所未能也凌氏
自貽之戚然愛子就逮羣獲見法亦足以洩衆怒矣叅
䟽得無乃過乎又不知將來作何結束也使旋聊此附

復不次

又

昨者草次附申區區出處鄙見而我老丈以大義見裁
必欲使之一出蓋先君子受上恩至深厚而家弟近復
以病乞身僕更偃蹇朝命以自為名罪何所逃老丈責
我是也且甲申之濫竽老丈有力焉然以為未可出今
者以為不可不出老丈豈宛曲隨人作圓方者且病弟
大有起色矣僕亦何辭以貪一壑第衰態如此安能強

自振刷以小補國家苟冒昧尸祿異日狼狽而歸老丈
憐之晚矣捧袂之期或在春晚也別諭六生事緣袁之
長子誠可憐他不盡爾且所犯題劇不小臺綱凜然豈
可以兒戲望之僕固已測老丈之惠不克終亦不願老
丈之終此惠也凌氏有三尺可無復言矣使旋此附復
不次

鄧太史汝德

前於許敬菴京兆處拜先生手教匆匆未及作答旋聞

有經筵之召私與太原公往復三四意必欲先生一出以光聖朝倘念太夫人高年不欲遠離或朝叅應酌有妨靜攝則留都玉堂小可栖托不謂中途復上請告之章艤首遂南確乎不拔真初九潛龍也第方天下文明之際或可少一見乎為仰師弟所論得用不得體得體不得用先生是大乘菩薩不宜入辟支佛果僕以亡弟之痛旦夕歸矣而為此言先生將無咲其不情也同年劉同野子便附此不一

吳太史

世貞懶廢僻處蝸廬每公過吾州即拜尊刺之辱知而
倉皇追跡至河許則雲帆縹緲於清洋玉山之間雖從
者不忍題鳳僕寧無報顏君子之至於斯也聖主不憚
罪已手詔起二龍淵潛復返論思之職千載一時甚休
甚休惟是賢者咳唾之餘天下以為口實所望一立善
類赤幟而已么膺瑣屑似不足以煩方寸也僕故名教
外長物捨身之未能苟以藏拙便懶百念灰冷惟懷賢

耿耿未盡忘竊成一排律贈公與定宇太史書之扇頭
及不腆即附定宇致之知不麾棄幸毋以示人可也勉
旃自愛不一不一

徐宮諭

曩時公自山中北上而貞以匏繫斗室不獲聞問遂致
闕焉無一介之使今春乞骸請告兩有蒼頭此行此心
望公如望日而病廢之人不敢徧作朝賢書問有所掛
漏則生得失以故益自沮而公不我棄也惠之教言副

之武錄則奚啻几杖之見媿矣公瑰竒之文冲夷之度
清孤之操所謂材則梗杞德則金玉而能黯然不露太
音希聲其在茲乎破山之劒輕用之而光奪鋒挫者何
足與議此也區區已老而且有鑿坏盟乞骸之不得故
移而請告非敢復有他覬也旦夕轉徙長林叢薄中為
七尺之坎以待耳茲因學海太史便附此社稷蒼生之
軀唯自愛不一

馮開之太史

前有一書附果上人去緣果欲收月溪講師之骨而瘞之為數行先容計已達矣同州王老來却得先生教言欲於秋涼訪我海上村中紫葵白茄所不乏獨僕雖習蔥嶺家言尚是門外漢不足與先生棒喝相持第二兒子驕雖稚似窺見一斑其時幸與達觀禪伯偕一勘之也王老志乃可志耳此公少時好攝生無所得始遊五臺從苦行妙峰比丘講而又無所得慕曇陽師之跡而過江又無所得以西方為三十六最後策然已老且好

酒不耐枯淡須大善智警策之作隔世緣可也敝城有
海寧寺者其正殿一佛二菩薩像端嚴妙好為江左第
一而殿久圯勢且及像果上人之師明因者慨然欲葺
理僕亦勉力為助之資且半而不能繼不敢妄損先生
索欲借一言之重於里中好善者即無異大檀越也屠
長卿遂杳然無復跡尚不至作善星比丘先生能以白
牛車喚轉之乎不次

弇州續稿卷一百九十四